

28.01.2015 um 05:40 Uhr

hr1 ZUSPRUCH

Ein Beitrag von

Helwig Wegner-Nord,

Evangelischer Pfarrer, Frankfurt

Social freezing

Mein Bekannte, de Kall, hat neulich mitkriegt, was „social freezing“ is. Also, was es da jetzt fer Methode gebbe tut, um Kinner ze kriegen, oder grad aach net, sonnern später, wanns de Leud vielleicht besser in de Kram basst.

Da wern Eier vonnere Fraa entnomme, sache mer ma, Stücker 25, des reischd dann normaler Weis später fer zwaa Kinner, un die, also die Eier, wern dann uf ein Schlaach uf Minus 196 Grad abgekühlt. „Rapid freezing“, schockgefrostet, wie mer des nennt.

Isch unnerhalt misch als ema gern mit meim Bekannte. Wann der e neu Thema uffgeschnappt hat, dann hat er aach e eischene Meinung dezu. Aber diesma hab isch misch doch e bissi gewunnert. Fer des Thema mit dem social freezing müsst er sich im Grund net persönlich interessiern. Er hat ja mit sei Fraa e ganz Reih eischene Kinner kriegt, sozusaache „in the old way“.

Aber de Kall war doch einischermaaße engagiert bei dem Thema. Waaßte, saacht er zu mir, waaßte, ersd hab isch bloß gedacht, dess die ganze Fraue doch spinne, die sowas mache. Un die Amis bei apple und facebook sowieso. Die wolle ihrene Mitarbeiderinne des egg-freezing sogar bezahle. Aber dann hab isch in soner Illustrierde drüber geles. Un gemerkt, dess des Ganze eischendlich ausm ganz annere Grund erfunde worn is un manschma werklisch e gut Möglicheid is, um en Problem ze löse.

Da war zum Beispiel ma e Fraa, die musst, Anfang dreißisch, wesche ner Krebserkrankung e Schemotherapie mache. Un Schemo heißd, dess de net weißd, was in dir all kaputt geht. Un da hat se vorher schnell en Satz Eier einfrieren lasse – in der Hoffnung, dess se ersdens mit dem Krebs ferdisch wird un zweitens hinnerher, wann se wieder gesund is, sich die Tiefkühleier befruchtet wieder einsetze lasse könn. Des is doch genial, erschendwie. Oder? Un dann hat da gestanne, dess in Deutschland die meisde Fäll von social freezing aus genau dene medizinische Gründ gemacht wern.

Aber, saach isch zum Kall, aber des, wo die amerikanische Firma mache, des is doch werklisch grenzwertisch! Un da habbe aach gleich bei uns die ganze Bischöfe un die Ethikkommission un

isch waaß net wer alles gesche protestiert.

Ja schon, saacht de Kall. Aber warts ema ab. Ersd ham sisch damals in de seschzischer Jahr all uffgerescht, dess mer e Pill erfunne hat, um sozusaache mit künstlicher Hilfe kaa Kinner ze krieje. Un jetzt kann mer mit künstlicher Hilfe Kinner krieje. Da waaß isch ja net, welsche Uffreschung mir lieber is.

Am End aber, werste sehn, da leschd sisch die aane wie die annere Uffreschung.